

LUNARI pal 2006



Camila Todescato

“La Siora Camila”

La storia dai nestris piçui paîs, come ch'al po jessi Romans, si invuluça cuasi simpri cu lis ostarîs dal lûc, ambients di ligria, incuintri e agregazion, indulà ch'a son stadis spes imbastidis vicendis di clamôr, restadis par simpri intal ricuart da int e tramandadis di gjenerazion in gjenerazion, mentri i ustîrs a son simpri doventâts, dopo vê passât una vita daûr dal banc, un pont di vê e propri riferiment par chel ch'al rivuarda la transmission da memoria locâl.

Un di chescj ustîrs, anzi una ustîra, ch'e à leât il so non a la storia di Romans, e je stada la popolâr Camila Todescato, che par tancj ains e à gestît la famosa tratoria "Al Cavallino", sistemada inizialmentri intai locai di partigninça dal Palaç Lang e plui tart trasferida in Via Latina, indulà che cumò al è un salon di paruchira.

La Camila e jera nassuda il 13 di Zenar dal 1886 ad Arcugnano, in provincia di Padua, dal matrimoni tra Maria Negri e Giuseppe Todescato, chest ultin clamât ancja "Bepi dei cavai", in riferiment a la granda passion che ta famea coltivava intai confronts das cuatri çatis.

E propria viars la fin dal 1800 la famea Todescato e je rivada a Romans, clamada dal dotôr e avocât Francesco Waitz, par che i curàs i cjavai dal so arlevament, che il stes al veva metût in pins inta stalis intor dal bearç dal Palaç Lang.

Dopo vê vivût par diviars ains intal nestri paîs, ocupant lis stanzis dal palaç stes, la famea Todescato, concludût il so complit a favôr dal dotôr Waiz, e veva decidût di tornâ intal natîf Venit, ma no ducj i soi components a àn orût seguî Bepi e sô femina: a Romans, di fat, si son fermâts doi lôr fioi, la Camilla e so fradi "Sior Atilio Todescato" (1897 - 1979).

Cuant ch'e veva dome 16 ains di etât, tal 1902, la Camila si è maridada cul marangon dal lûc Gigi Plez, nassût intal 1879 e

muart ancjamò zovin intal 1916.

Cualchi an plui tart, a la siora Camila i si è presentada l'ocasion di rilevâ la tratoria "Al Cavallino", che in chei timps e jera di proprietât di un grop formât di nûf socios, che, intal moment ch'a varessin dovût sborsâ bêçs par comedâ il locâl, i àn proponût di comprâlu a la siora Camila, che, dopo vê pensât a lunc parsora, lu à comprât e lu à tignût in pins fin tal 1968, cuant ch'e je muarta, doventant una figura storica pal nestri paîs, cussì come che si à fat cognossi in dut il nestri teritori pa bontât da sô cusina, curada cun profont amôr, in chel locâl simpri plen di int, indulà che si mangiava di Diu e indulà che si son ancjamò tignudis grandis fiestis e storics velions, mentri in ocasion da fiera di Santa Lisabeta nol jera forest che no si fermàs "Ca da Camila" par mangjâ il dindiat.

E propria ricuardant il dì dai marcjats, us ripuarti un simpatic fat che mi veva contât a so timp la pûara Elsa Plez, fia da Camilla, che, ricuardant che una volta si diseva che se a San Carli al jera stât biel timp, a Santa Lisabeta al sarès di sigûr plovût, mi à contât che un an, cualchi zornada prima da fiera di Romans, un becjar di Monfalcon i veva fati visita a sô mari, par proponigi di comprâ una buna scorta di tocs di dindiats, par fâ cuei e vendi la di di Santa Lisabeta.

La Camila però, savint che a San Carli al jera stât biel timp, e jera esitante, ancja parsè che no i plaseva par nuia la direzion da bandieruta che svintulava sul tet da colombara dal Palaç Lang. "*Quela bandiereta no la me convinzi per niente* - i veva diti la Camila al becjar - che, nancja a dîlu, i veva rispuinduti: "*Ma siora Camila cossa la bazzila con quella bandiera, la compri senza paura, che il tempo tegnerà de sicuro*". E cussì la Camila i à ordenât tre bielîs podinis di dindiats, che cualchi zornada dopo e à dovût tornâ a vendigi, a metât presit naturalmentri, viodût che intal dì di Santa Lisabeta e je vignuda tanta di chê ploia, che no je rivada a vendi nancja una porzion di dindiat.